

Wednesday, February 19, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

ASSEMBLY SESSION

Mizoram Legislative Assembly 9-na, thutkhawm vawi 4-na leh Budget Session ni bawk chu vawiin khan Legislative Assembly House, Aizawlah tan a ni.

Budget Session bultan ni ah hian Mizoram Larsap Gen (Rtd) Vijay Kumar Singh chuan thusawiin Legislative Assembly Annual Budget Session chu Sawrkar pawisa lut leh chhuak tarlanna satliah mai nilo, mipuite tana Sawrkar hmachhawp leh ruahmannate tarlanna a nih thu sawiin, assembly session-a thil sawiho leh rel te chuan mipui tan hmasawna a thlen ngei a beisei a ti a. Mizoram Legislative Assembly-in rorelna kalphung zahawm tak vawnhim kawngah sulhnu duhawm tak a lo nei tawh thin tih sawiin, member-te chu he sulhnu chhuanawm tak hi chhawmung zel turin a sawm a ni.

Budget Session hi ni 14 chhung an thu dawn a, March ni 4 ah Finance changtu Chief Minister in Mizoram Budget (2025 – 2026) a pharh dawn a, Session hian March ni 20 thleng a aw h ang.



GOVERNOR – HANDHOLDING SCHEME

Larsap Gen (Rtd) Vijay Kumar Singh chuan Bana Kaih scheme in a tum ber chu Viksit Bharat 2047 leh United Nations Sustainable Development Goals (SDGs) hlawhtlinna kawnga tha thawh ve a ni a ti.

Larsap hian vawiin khan Mizoram Legislative Assembly Budget Session thutkhawm hmasa berah thu sawiin Mizoram Sawrkar flagship program Bana Kaih in a tum ber chu India in kum 100 a tlin huna ram hmasawn a nihna tura tha thawh ve tur leh Mizoram chu hmasawn zinga a tel ve theih na tur a ni a ti a, kuthnathawktuten intodelhna tlak eizawna ngelnghet an neih theih nan leh hmasawna rualkhai siam nan ruahmanna hrang hrang a chhawmdawl tum an ni a ti a, hmasawna chu mi tin thleng phak anih theih nan hmalak ani a ti bawk.

Larsap chuan Bana Kaih hmalakna kalpui dan tur hlawm 5 ah then a ni a ti a, heng zingah hian sawrkar thawhpui bank leh financial institution ten Progress Partner te hnenah Loan an pe dawn a, heng mi te tan hian sawrkar chuan Credit Guarantee Scheme awmsa hmangin Guarantor ah a tang dawn

a, hemi atan hian sawrkar chuan bank pathum - State Bank of India (SBI), Mizoram Rural Bank (MRB), and Mizoram Cooperative Apex Bank Ltd (MCAB) te chu inremna thuthlung a ziah pui tawh a ti a, Handholding Policy hnuaiah Chief Minister's Special Category Scheme siam a ni tih sawiin tanpuina cheng nuai khat chin pek chhuah a ni dawn tih a sawi.

Larsap chuan Bana Kaih hmalakna hnuaiah Mizoram sawrkar chuan Minimum Support Price (MSP) thlai chi li – Sawhthing, Hmunphiah, Aieng leh Mizo Hmarcha a ruahman a ti a. Kuthnathawktu ten sawrkar rate bituk anga hralhna an hmuh loh chuan, sawrkar rate bituk a phak lohna hi sawrkar chuan a hnawhkhah sak dawn tih a sawi bawk.



GOVERNOR – SECURITY

Larsap Gen (Rtd) Vijay Kumar Singh chuan ram hmasawna atan remna leh muanna vawnhim chu thil pawimawh tak ani a ti.

He thu hi vawiina Mizoram Legislative Assembly Budget Session hmasa berah sawiin Larsap chuan Mizoram Police ten rim taka khua leh tui te venhim hna an thawh zarah kum 2024 chhungin Mizoram chhungah dan leh thupek kenkawh kawngah harsatna lian tham thleng a awm lo a ti a, Mizoram Police te chuan State dang nena ramriah harsatna a thlen loh nan ngawrh takin hna an thawk reng tih sawiin ramdang te nena ramri venghim turin Assam Rifles leh Border Security Force te nen tanghoin, venhimna hna khauh takin an kalpui thin tih a sawi.

Larsap chuan Home Department ah hmasawna hrang hrang hmuh tur a awm a ti a, Police hmunhma leh hmanrua bakah Police awmna hmun thuam that hna nasa takin thawh ani tih sawiin Mizoram Home Guard Volunteers te Rifle Allowances chu Rs. 100 a tihpun a ni tawh dawn a ti bawk, Khawtlang ralmuanna leh mipuite himna kawnga hmalakna kal zelah Mizoram FSL chuan ND&PS Act leh BNSS 187 in a phut angin, case chingfel loh an nei lo a. Eng case pawh ni 30 chhung ngeia chingfel turin huntiam nghet tak an vawng tih a sawi bawk.



GOVERNOR – SOCIAL WELFARE

Larsap Gen (Rtd) Vijay Kumar Singh chuan Jordan Centre, Sethawna ruihhlo ngawlveite enkawlna hna thawk duh te tana Expression of Interest (EOI) thehltu turin sawmna tihchhuah a ni tawh tih a sawi.

Larsap hian vawiina Assembly Budget session-a thu a sawina ah he thu hi sawiin nikum September 2024 atanga Ruangphurh kalpui anih hnua mi 238 in tanpuina an dawng tawh a ti a, an bank account-ah thun mai thin a ni tih sawiin A vaiin cheng nuai 23, sing 3 sang 3 zathum sawm pali pek chhuah a ni tawh ati a, Ruangphurhna atan State Annual Budget 2024-25 -ah cheng nuai 500 dahhran a ni tih sawiin a tirah kilometre khat zelah cheng 35 bituk a ni a,

a hnuah cheng 40-ah san a ni tih sawiin nikum December ni 23 ah rate thar hman tan ani tih a sawi.

Larsap chuan Mizoram pumah Eklavya Model Residential School (EMRS) sikul 11 a ding tawh a ti a, State Action Plan hnuaiia upa zawk enkawl thiam bik zirtirna pekna tur ‘Creation of Pool of Trained Geriatric Caregivers’ kalpui turin RIPANS chu training partner atana thlan an ni tih sawiin Batch pahnih (2) in training an zo tawh tih a sawi bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.



HSLC EXAMINATION

Mizoram Board of School Education hnuaiia HSLC Examination 2025 chu vawiin atang khan theory exam tan a ni.

Vawiin khan MBSE hnuaiia HSLC Exam Centre hrang hrangah Mizo Subject exam neih tan a ni a, MBSE thuneitute sawi danin kumin hian HSLC Exam Centres 130 a awm a, HSLC Exam tur candidate 19303 awmin heng zingah hian mipa 9068 leh hmeichhia 10235 an awm a, February ni 12 khan Practical Exam neih tan niin HSLC exam hi March ni 11-ah an zo ang.

